

Ikhwan Bertabagh – Menyambut Hari Raya Korban

Suara Takbir 4000 Umat Islam Bergema di Angkasa

Suara takbir yang bergemuruh, yang terpancar dari hati yang beriman, kedengaran bergema dengan hebatnya di angkasa raya, dari kira-kira 4000 umat Islam – lelaki dan perempuan – yang telah berhimpun di tanah lapang “Great Eastern” Geylang Serai Singapura, kerana menyambut Hari Raya Aidil Adha – Hari Raya Korban.

Itulah dia Majlis Tabligh yang telah diadakan oleh “Persatuan Ikhwan” tepat pada malam hari raya yang berbahagia, 9 Zulhijjah 1378 – (16 Jun 1959) yang lalu.

Al-Fādil al-Ustādh Sheikh Mahfuz Sulawesi, mubaligh Islam Indonesia yang terkenal telah meriwayatkan sejarah korban dan memberi nasihat-nasihat yang berharga, manakala Ustazah Aminah binti Kwong Husain telah menghuraikan pula “Ibadah Haji dan Hikmahnya”.



Majlis dibuka dengan tiga kali takbir oleh

tuan pengurus Saudara Abdullah bin Hamid al-‘Idrūs
(Yang di-Pertua Ikhwan) dengan harapan “mudah-mudahan dengan takbir itu, Tuhan ‘azza wa jalla akan membuka hati kita semua supaya kembali kepada jalan yang direndai-Nya. Sekalian hadirin telah menyahut takbir itu dengan penuh semangat.

Al-Ustādh Haji Salimi, Imam Masjid Sultan,

telah membaca *al-Qur’ān al-Karīm*, (sebahagian dari surah al-Şāffāt), yang memperikan taat setia Nabī Allah Ibrāhīm menjunjung perintah Tuhan supaya menyembelih anakandanya yang dikasihi – Nabī Ismā’īl ‘alayhumā al-ṣalātu wa al-sallām, yang berkesudahan anakandanya itu telah ditebus oleh Allah ‘azza wa jalla dengan seekor kibash, dan kedua-duanya telah dibalas dengan sebaik-baik balasan.

Tafsir ayat-ayat suci itu telah dibacakan oleh

Saudara Kalam Hamidi.

Saudara Abdullah al-‘Idrūs, Yang di-Pertua Ikhwan.



Ustazah Aminah binti Kwong Husain sedang bersyarah dalam

Majlis Tabligh Ikhwan tentang “Ibadah Haji dan Hikmahnya”.

Menyampaikan Wasiat Nabī

Sebelum pensyarah-pensyarah budiman dipersilakan memberi

syaranan, saudara Yang di-Pertua Ikhwan telah tampil menyatakan

kepada hadirin, bahawa tujuan Ikhwan mengadakan Majlis

Tabligh ini ialah kerana hendak menyampaikan amanat dan

wasiat junjungan kita Nabī Muhammad *sallā Allāhu ‘alayhi*

wa sallam yang telah disabdakannya kepada umat Islam di Padang

Arafah, ketika baginda menunaikan ibadah haji - *Hujjat*

al-Widā’, pada kira-kira 14 kurun yang lalu. Lalu dibacakannya


pati khutbah Rasulullah yang bersejarah itu, yang telah meletakkan asas persamaan dan persaudaraan yang sejati diantara sekalian umat Islam. Sekaliannya adalah sama: Mempunyai hak yang sama dan menanggung kewajipan yang sama.

Dijelaskannya juga tentang hak dan kedudukan kaum perempuan di dalam Islam. Rasulullah – katanya lagi – telah menegaskan di dalam wasiatnya itu bahawa kaum perempuan adalah menjadi amanah Allah kepada kaum lelaki. Mereka tertuntut supaya dikawal, dididik dan dipimpin dengan sebaik-baiknya. Sebagaimana seorang suami mempunyai hak dan berkewajipan terhadap isterinya maka begitu juga sebaliknya.

Inilah pati wasiatnya, kata beliau lalu bertanya: Adakah kami telah menyampaikan wasiat junjungan kita – Muhammad ibn ‘Abd Allāh *sallā Allāhu ‘alayhi wa ālihi wa sallam* kepada saudara-saudara?

Manakala hadirin menyahut mengatakan: “Ada” maka beliau pun menadah tangan ke atas sambil berkata: Tuhanmu persaksikanlah! Ikhwan telah menyampaikan amanah Nabī-Mu!

Yang di-Pertua Ikhwan telah menutup ucapan ringkasnya dengan berkata: Bahawa Persatuan Ikhwan tidak akan meminta apa-apa bantuan kepada saudara-saudara, tetapi jika saudara-saudara dengan hati yang terbuka dan ikhlas sudi hendak bekerjasama dengan kami, maka kami sedia menyambut sokongan saudara-saudara itu dengan segala hormatnya. Marilah kita tegakkan agama Allah di tempatnya yang sebenar, supaya jangan terrajah, dan supaya menjadi mulia semulia-mulianya!



Suatu pemandangan dalam Majlis Tabligh Ikhwan, atas . . . kelihatan kaum ibu, dan di bawah: Kaum bapa sedang khusyuk mendengar syarahan yang dihamburkan pada malam yang berbahagia itu.

Ibadat Haji dan Hikmahnya

Setelah itu Ustazah Aminah binti Kwong Husain telah tampil menghuraikan soal ibadah haji dan hikmahnya. Ibadah haji yang menjadi rukun Islam yang kelima telah dihuraikan satu persatu dari keempat-empat seginya. Dari segi yang berupa ibadah (*ta'abbudiyāh*), dari segi yang berupa akhlak (*akhlāqiyāh*), dari segi yang berupa pergaulan dan perhimpunan (*ijtimā'īyyāh*), dan dari segi yang berupa iktisad (*iqtisādīyyah*).

Berpaling kepada pemuda-pemuda Islam yang membanjiri perhimpunan ramai pada malam itu, Ustazah Aminah berkata: Bahawa pemuda-pemuda Islam adalah memikul tugas yang besar dalam perjuangan menegakkan kedaulatan agama Islam di tanah air.

Riwayat Korban yang Bersejarah


Sebagai pensyarah yang akhir sekali al-Fāḍil al-Ustādh Mahfuz telah tampil meriwayatkan kisah korban Nabī Allah Ibrāhīm dan anakandanya Nabī Ismā'īl 'alayhumā al-ṣalātu wa al-sallām. Ujian dan dugaan yang telah ditempuh oleh mereka, dan taat setia mereka menjunjung perintah Allah 'azza wa jalla seyogialah menjadi contoh yang baik bagi sekalian umat Islam – kata beliau.

Ustaz Mahfuz juga telah menarik perhatian kaum ibu supaya mereka mencontohi semangat Sītī Hājar, ibu Nabī Ismā'īl, yang dengan tabahnya menerima dugaan pahit setelah ditinggalkan oleh Nabī Ibrāhīm di padang Sahara yang kering kontang berdua dengan anakandanya yang masih kecil itu.

Umat Islam Tetap Bersatu

Tatkala menyatakan kesalnya terhadap beberapa kejadian yang berlaku dalam masa diadakan pilihanraya baharu-baharu ini, Ustaz Mahfuz berkata: Perbuatan setengah – setengah pemimpin yang beragama Islam melemparkan kata nista dan membuka kaifan¹ saudaranya yang lain, adalah melanggar ajaran Islam bahkan merugikan umat Islam sendiri.

“Sebenarnya umat Islam tetap bersatu, tetapi pemimpin – pemimpinlah yang memecahbelahkan mereka” – kata beliau lagi.



Pelajar – pelajar Maahad Hisamuddin, Kelang, Selangor,

bergambar ramai untuk kenang-kenangan.



Suatu pemandangan dalam majlis keraian guru-guru pelawat agama seluruh Terengganu kepada Yang Berhormat

Menteri Besar Terengganu, Dato' Perdana Menteri Diraja, yang akan meninggalkan negeri ini kerana menjadi

Pesuruhjaya Tinggi Persekutuan Tanah Melayu ke Pakistan.

Majlis ini diadakan di rumah Pemeriksa Hal Ehwal Agama Terengganu baharu-baharu ini. Seorang qari kelihatan sedang membaca al-Qur'an al-Karim.

¹ kesilapan ejaan, sebetulnya ‘keibaikan’